

奉天通志

三編之一冊

大事清世宗高宗

31-44

奉天通志卷三十一

大事三十一 清

清五 世宗

世宗雍正元年春正月以多爾濟襲科爾沁多羅貝勒爵

清實錄正月丙午以科爾沁多羅貝勒阿畢達子多爾濟襲爵
三月發宗室吳爾占等於盛京

清實錄三月壬辰諭總理事務王大臣等吳爾占所犯之罪甚
重又係宗室著從寬免死從前伊父獲罪於皇考貶其親王之
爵伊等希圖王爵陷伊宗嗣於死地色亨圖又覬覦王爵卒不
能得復生怨望以致皇考震怒經希之子並吳爾占父子色亨
圖父子給假五日料理發往盛京到盛京時無論城內城外令

其在五十里內居住

東華錄三月壬辰吳爾占等以罪發往盛京

移錦州通判於義州義州巡檢於天橋廠

清實錄三月辛丑移奉天錦州府通判駐義州義州巡檢駐天橋廠從奉天府府尹鄒汝魯請也

夏六月議遣大臣一員駐紮寧遠錦州大凌河等處

清實錄六月丙子諭侍衛內大臣等奉天地方乃我國家啓祥之所甚屬緊要朕前詣奉天聞地方人言論悉知兵丁差役煩多不能休息之處曾降諭旨令將軍唐保住將所用塘哨悉行撤退而將軍副都統於定額親隨兵丁之外多帶百餘人省城官員又各帶其子弟因而屬員效尤各多帶兵丁以致應差乏

人兵丁仍多勞苦又於槍手中以選擇熟練之人爲名每城調取二三十人田獵夫省城相隔遙遠往返人馬俱疲再自山海關以至廣寧皇莊頭三百有奇止交筆帖式領催等微末人員駐紮中後所催徵錢糧辦理事務以致交結匪類糶賣官糧漁利入己且自中前所至錦州義州廣寧等處隔二三百里詞訟案內干連之莊頭地方官調取抗不赴審即使到案亦抗不遵行以致案內干連之人每多苦累再人命案件呈報地方官之後雖相距數百里亦必俟筆帖式領催檢驗炎暑日久難以憑信則百方檢驗慘不可言朕之所聞如此從前雖每年派卿員前往管轄莊頭因不實心辦理於地方並無裨益應遣大臣一員駐紮於寧遠錦州大凌河等地方令其料理一應公務管轄

里長獵戶遇有詞訟事件會同地方官審結此所遣官員應令駐紮何處著領侍衛內大臣等兵部內務府總管公同詳議具奏

秋七月遣官至盛京糴米運京師

清實錄六月丁丑諭戶部京師人民聚集食指浩繁米糧儲備不可不裕近年盛京年歲豐收米價亦賤酌量動正項錢糧採買數十萬石運送京師大有裨益著怡親王隆科多會同詳議具奏

又七月乙酉戶部遵旨議覆遣官往盛京採買米糧得旨盛京差滿官一員前往近據內府佐領等奏稱現今莊頭等將窖米一十一萬五千四百八十四石糴賣一半其餘一半米石暫行

存貯俟得新糧於次年糶賣此派去之員一到盛京將錦州等處將軍府尹及內府佐領所屬見存米石查看總數於近海口處兌十萬石卽將內府佐領等所存庫銀動用僱覓民船裝運如倉內現存米石數目不敷動盛京錢糧買米運送

東華錄七月甲申遣官赴盛京江西湖廣糶米運京師

奉天將軍唐保住奏參虧空錢糧各官

清實錄七月己亥奉天將軍唐保住參奏虧空錢糧各官應照數追完得旨將軍唐保住將虧空錢糧之存住等參奏甚是歷年以來諸臣不知感戴皇考寬厚慈祥之恩轉以侵盜國帑勒索小民之事視爲故常玩法已甚不可不隨時整理此案係已往之事是以但加申飭倘三年以後仍復如是斷不寬宥爾等

宜深悉朕心凡事須秉公辦理

八月增設奉天駐防蒙古協領

清實錄八月丙寅兵部遵旨議奏駐防奉天增設蒙古協領一員從之

冬十月命奉天建忠義節孝二祠

清實錄十月甲寅禮部遵旨議奏應令順天府奉天府等處建二祠一爲忠義孝弟之祠建於學宮之內祠門立石碑一通刊刻姓氏於其上已故者設牌位於祠中一爲節孝婦女之祠另擇地營建祠門外建大坊一座亦標題姓氏於其上已故者設牌位於祠中每年春秋二次致祭從之

東華錄十月甲寅禮部遵旨議奏應令順天府奉天府等處每

處建二祠一爲忠義孝弟之祠一爲節婦孝女之祠

朝鮮請罷欄頭許之

朝鮮景宗實錄三年十月己巳移咨燕京請罷欄頭許之先是
我國使臣回還之時一行員役所市物貨隨便雇車遲速在我
自己巳年間遼人胡嘉佩等請設欄頭獨專雇利每歲除額徵
稅銀二千兩自此行留淹速唯意所欲動滯多月浪費盤纏裘
褐愆期廢不貿遷或穿包竊貨許多侵剝逐年滋加人衆雜遯
且有潛相買賣之弊至是移咨禮部請加禁斷清主令戶部侍
郎吳爾泰刑部侍郎馬爾齊給事中繆沅等查奏我國亦送譯
官韓永禧劉再昌金澤金慶門四人同胡嘉佩董名珩李顯龍
等辨明於鳳凰城果如咨文語遂將嘉佩等革職枷號三月各

鞭一百以鳳凰城城守尉專理我國事務而並不嚴查揭報除前任守尉吳爾都二級使行時貿易包子聽如前從便傭載其進貢包子仍令動驛站車拉運欄頭之弊自此始革而當初設置出於康熙之旨故欄頭納稅皇帑締結宮掖一失其利大生悲怨造謗無所不至云

二年春三月封科爾沁協理旗務台吉烏爾呼滿爾爲輔國公

清實錄三月戊寅封科爾沁協理旗務台吉烏爾呼滿爾爲輔

國公

夏四月停派赴盛京審理偷創人參官員

清實錄四月壬子諭刑部禁止私創人參舊例不論已得未得俱解送刑部往返拖累故於盛京刑部監禁每年差官前往審

理朕思伊等俱係圖利窮民春夏時被獲監至九月十月方得
審結延挨月日身受寒暑多致疾病死亡甚屬可憫盛京有將
軍刑部併副都御史永福嗣後將各地方所獲者卽行審理作
速完結年底彙齊具本啓奏自今將審理偷創人參之部院衙
門堂官停其遣往

考察奉天等處駐防軍政

清實錄四月壬申考察奉天等處駐防軍政卓異官五十五員
罷軟官九員不謹官一員浮躁官二員才力不及官十員年老
官四十七員有疾官二十三員分別陞賞處分如例

六月封科爾沁固山額駙拉錫協理旗分事務一等台吉噶爾弼
俱爲輔國公

清實錄六月己亥封科爾沁固山額駙拉錫協理旗分事務一等台吉噶爾弼俱爲輔國公

秋八月增盛京學額

清實錄八月庚寅禮部議覆奉天府府尹鄒汝魯疏言臣遵奉皇上詣學恩旨增定盛京入學額數奉天府學錦州府學請各加增五名滿字號加增一名合字號加增二名應如所請從之
冬十月革刑部尙書阿爾松阿二等公爵發奉天居住

清實錄十月丙申諭內閣前因刑部尙書不得其人將阿爾松阿特加擢用乃受任以來無心効力朕勸之不聽懲之不畏令其總理天下刑罰大事於國事無益刑部尙書員缺著禮部尙書塞爾圖調補

又十月戊戌二等公阿爾松阿緣罪革退以其伯音德襲爵

東華錄十月戊戌革二等公阿爾松阿爵發奉天居住

清史列傳

二十

二年十月上召大學士九卿科道等諭曰本朝大

臣中居心奸險結黨營私惟阿靈阿揆敘爲甚阿靈阿乃溫僖
貴妃之弟當年貴妃喪事停殯於朝陽門外阿靈阿舉家男婦
在殯所守孝伊與長兄法喀素不相睦必欲置之死地皇考洞
悉其奸面加誡飭阿靈阿兇惡益甚致干聖怒嚴行處分阿靈
阿遂敢怨望皇考二阿哥之廢斷自聖衷豈以臣下蜚語遂行
廢止乃阿靈阿揆敘借此機會攘爲己力要結允禩等同爲黨
援肆無忌憚日夜謀爲造作無稽之談轉相傳達以致皇考聖
心憤懣莫可究詰此朕與阿靈阿揆敘不共戴天之恨也伊自

知罪惡深重爲國法所不容自是心愈奸狠縱恣酒色以致滅身實天誅之也其子阿爾松阿朕見其言詞舉動似可教導驅使諭以爾父罪惡甚大固難赦宥但爾能改悔前非誠心効力便爲幹父之蠱近日阿爾松阿不但無改悔之念其柔奸狡猾甚於其父若復優容則縱恣日甚不至法難寬宥不止朕前往盛京恭謁陵寢時見阿爾松阿曾祖額亦都之墓附在二陵之間當日君臣相遇恩義之厚禮待之隆千古罕有迄今令人景慕不已適伊族姪奉天將軍唐保住隨行朕顧謂唐保住爾祖受國厚恩無可倫比爾等宜效法爾祖輸忠盡力方不愧勲臣之後今阿爾松阿所行如此著革爵發往奉天守伊祖墓令其思過若能改悔前非安靜謹守則已倘不痛自懲艾尙敢逞其

故智必置重典著將阿靈阿墓上碑文磨去改鑄不臣不弟暴悍貪庸阿靈阿之墓以正其罪昭示永久

十二月唐保住罷以綽奇爲奉天將軍

清實錄十二月癸未解奉天將軍唐保住任以正黃旗蒙古都統綽奇爲奉天將軍

三年春二月革一等公鄂倫岱爵發奉天居住

清實錄二月乙未一等公鄂倫岱緣罪革退以其弟領侍衛內大臣套岱襲爵

東華錄二月乙未鄂倫岱有罪削爵發往奉天居住

夏四月詔諭盛京官吏

清實錄四月庚辰諭盛京將軍滿漢大臣大凌河副都統衆城

守尉等邇來盛京諸事隳廢風俗日流日下朕前祭陵時見盛京城內酒肆幾及千家平素但以演戲飲酒爲事稍有能幹者俱於人蔭內謀利官員等亦不以公務爲事衙門內行走者甚少其聚會往來不過彼此相請食祭肉嬉戲而已司官竟有終年不一至衙門者堂官亦置若罔聞坐台之人看守邊口俱係關東人伊等雖有押送罪人之差而當兵者全無當兵之實爲官者亦無爲官之道朕深知此等陋習雖降諭旨數次竟不悛改因將將軍大臣內不及者革退另簡爾等補授爾等雖係新任但能留心細訪卽便知之應將盛京陋習極力整飭令其悛改復還滿洲舊日儉樸風俗勤學騎射武藝若有惡亂之人卽加重處以儆其餘將軍大臣其欽遵朕旨與下屬官員同心協

力各自黽勉力改從前陋習再盛京地方乃本朝勦業之地關繫甚重爾等將聚集惡亂之人不時稽查應逐去者作速逐出境外大臣等若仍相推諉不實心效力朕訪聞治罪之時勿復怨悔

五月進鄒汝魯爲太常寺卿以左都御史尹泰爲奉天府尹

清實錄五月癸亥諭內閣盛京風俗甚屬不堪俱因蘇努爲將軍八年俯徇無知小人之心沽取虛名私恩小惠逞其機詐惟利是圖毫無裨益地方軍民之處風俗由是大壞非有爲國家實心効力之大臣盡心竭誠大加整理不能挽回風俗著都察院左都御史尹泰以原品往盛京署禮部侍郎兼理府尹事陞奉天府府尹鄒汝魯爲太常寺卿

耆獻類徵^{二十}尹泰傳三年五月以原品署理盛京禮部侍郎兼管奉天府府尹事

六月命奉天運糧至天津

清實錄六月癸亥諭戶部今歲天津等處地方米價騰貴著行文奉天將軍綽奇府尹尹泰照去歲之例將伊等地方糧十萬石由海運至天津新倉交與該地方官收貯再若有自海運糧之商人不必禁止聽其運至天津貿易不許他往

秋八月奉天停徵黑豆

耆獻類徵^{二十}尹泰傳三年八月疏言奉天府所屬承德等九州縣存貯米豆甚多倉廩不敷前府尹鄒汝魯請於地丁糧內折二徵銀爲建倉之費以雍正元年二年爲則本年折二之例應